



#### Aini Marina Graduan Terbaik Keseluruhan UPM



Dari kiri Aini Marina Ma'rof, Faizura Rohaizad, D.Y.M.M Tuanku Canselor UPM, Yap Wing Fen, Lee In Thing dan A'iffah Abd. Razak.

**SERDANG, 24 Okt.** – Aini Marina Ma'rof dari program Bacelor Pendidikan Pengajaran Bahasa Inggeris Sebagai Bahasa Kedua (TESL) telah dipilih sebagai penerima Hadiah Emas Canselor sempena Majlis Konvokesyen kali ke-32 UPM baru-baru ini.

Beliau yang merupakan pelajar Fakulti Pengajian Pendidikan UPM mendapat Purata Gred Nilai Kumulatif (PGNK) 3.927 muncul graduan terbaik keseluruhan UPM pada konvokesyen kali ini.

Dalam majlis itu Aini menerima Pingat Emas Canselor, sijil dan wang tunai RM5,000 yang telah disampaikan oleh Canselor UPM, Sultan Sharafuddin Idris Shah Ibt Al-marhum Sultan Salahuddin Abdul Aziz Shah di Pusat Kebudayaan dan Kesenian Sultan Salahuddin Abdul Aziz Shah (PKSSAAS) UPM.

Ketika ditemui beliau memberi tip iaitu belajar secara konsisten dan sentiasa bertanya kepada pensyarah walaupun di luar masa kuliah antara faktor kejayaannya.

"Kita juga perlu bersikap proaktif dan pandai menjaga hubungan baik dengan pensyarah untuk mendapat keberkatan dan menghormati mereka selain belajar secara berterusan," katanya lagi.

Selain Aini, graduan yang menerima anugerah universiti ialah Faizura Rohaizad, Bacelor Pendidikan Bimbingan dan Kaunseling dari Fakulti Pengajian Pendidikan dan Yap Wing Fen pelajar Bacelor Sains Dengan Pendidikan Kejujuran (Fizik) dari Fakulti Sains (kategori Hadiah Anugerah Pelajaran Diraja).

Graduan Bacelor Pentadbiran Perniagaan dari Fakulti Ekonomi dan Pengurusan, Lee In Thing memenangi Pingat Emas Alumni; A'iffah Abd. Razak, graduan Bacelor Sains Pertanian dari Fakulti Pertanian (Pingat Emas Yayasan Pak Rashid) dan Ahmad Zamri Alimin pelajar dari Fakulti Pengajian Pendidikan (Hadiah Syed Kechik).

Seramai 7,846 graduan dari pelbagai bidang pengajian telah menerima ijazah doktor falsafah (176 orang), sarjana (1,037), bacelor (6,128) dan diploma (499 pada konvokesyen kali ke-32 itu.

UPM menganugerahkan Ijazah Kehormat Doktor Ekonomi kepada Setiausaha Agung ASEAN, Dr. Surin Pitsuwan dan Ijazah Doktor Falsafah (PHD) dalam bidang Komunikasi Kemanusiaan kepada Menteri di Jabatan Perdana Menteri, Datuk Seri Ahmad Zahid Hamidi.

Majlis konvokesyen kali ini turut menyaksikan seramai 17 graduan yang merupakan kumpulan pertama tajaan Sime Darby Plantation Sdn. Bhd memperoleh diploma pertanian pengkhususan perladangan.

Konvokesyen UPM membabitkan 10 sesi menyaksikan Sultan Sharafuddin Idris Shah Ibt Al-Marhum Sultan Salahuddin Abdul Aziz Shah berkenan menyempurnakan pengumuman pada sesi pertama manakala Pro-Canselor UPM, Tan Sri Dato' Dr. Nayan Ariffin, pada sesi dua, lima dan lapan, Tan Sri Dato' Sri Lim Ah Lek, sesi tiga, enam dan sembilan serta Tan Sri Dato' Rozali Ismail sesi empat, tujuh dan sepuluh.

Sementara itu pada 23 Oktober, seramai 681 graduan Universiti Putra Malaysia-Institusi Pengajian Tinggi Swasta (UPM-IPTS) dianugerahkan ijazah Bacelor dan Diploma sempena Majlis Konvokesyen Program Kerjasama UPM-IPTS Ke - 10 di Pusat Kebudayaan dan Kesenian Sultan Salahuddin Abdul Aziz Shah, di sini.

Graduan berkenaan membabitkan 94 graduan Bacelor dan 587 Diploma melibatkan lapan program pengajian dan tujuh buah fakulti di UPM.

Graduan daripada 11 buah IPTS yang terlibat ialah Kolej SAL Kuala Lumpur Kolej Teknologi Antarabangsa Cybernetics, Kolej Teknologi Bestari, Kolej UNITI, Kolej Teknologi Timur, Kolej RISDA Melaka, Kolej Shahputra, Kolej Chermal Jaya, Kolej Antarabangsa Labuan, Kolej Poly-Tech Mara (KPTM) dan Pusat Pembangunan Kemahiran Pahang (PSSDC).

Empat anugerah pelajar cemerlang pada majlis konvokesyen tersebut ialah Anugerah Graduan Cemerlang Akademik Peringkat Ijazah Bacelor dianugerahkan kepada Noraziah Anida Mohd Rashid dari Kolej Teknologi Bestari dan Anugerah Graduan Cemerlang Akademik Peringkat Diploma dimenangi oleh Nortailiakma Mohamed dari kolej yang sama.

Lain-lain anugerah iaitu Anugerah Graduan Cemerlang Keseluruhan Akademik Peringkat Ijazah Bacelor dimenangi oleh Muhammad Iskandar Zulqarnain M.Suffian dari Kolej Teknologi Antarabangsa Cybernetics dan Anugerah Graduan Cemerlang Keseluruhan Akademik Peringkat Diploma milik Hafiz Baharudin dari Kolej Shahputra.



Oleh: Unit Media, Bahagian Komunikasi Korporat, UPM.

---

Hak Cipta Terpelihara 2007  
Universiti Putra Malaysia